

四庫全書

經部

欽定四庫全書

春秋說卷二十一

宋 洪咨夔 撰

襄公上

元年春王正月公即位

蒙以養正聖功也君心之開塞君德之進否莫重乎
童蒙之日養得其正則可以為聖為賢非其正則愚
不肖之歸成王以幼冲嗣立周公負而相之小毖訪
落皆以未堪家多難為言所以使之知王業之艱天

位之重不可以易為而日就月將學有緝熙于光明
則蒙養用力之本也公嗣位纔四歲涵養德性成就
氣質正惟厥初大臣有聖賢之學乃能進君于聖賢
之地是固非所望於後世苟得儒者隨其資利導之
亦必有開明之益由今攷之六歲如晉敢不稽首特
孟獻子為之辭七歲如晉聽政屬鄆借助亦孟獻子
為之辭髫齡朱儒猶有可諉至十二歲晉侯宴之于
河上問公年曾不知對會于沙隨之歲以生又季武

子為之辭宜其民情國事有懵焉而已蒙不知養行
父得不任其責乎雖然鬼嘯以陰盜行以夜君德開
明非權臣之利也三家方利公之昏冲以固其權尚
何以引以翼之思哉

仲孫蔑會晉欒黶宋華元衛甯殖曹人莒人邾人滕人
薛人圍宋彭城

楚取宋彭城封魚石不繫之楚而繫之宋著楚黨叛
之惡也

夏晉韓厥帥師伐鄭仲孫蔑會齊崔杼曹人邾人杞人
次于鄆

九國合圍彭城彭城既下率其師鼓行而前乘勝以
壓鄭何不可者而八國散歸韓厥獨以偏師致伐東
諸侯之師之至者則次于鄆以待之有餘不敢盡也
夫三軍以氣勝厲公謀鄭屢動列國之兵迄莫能制
其命非力不足也氣歟故也今諸侯之師左次厥以
一軍獨進略鄭趨楚不啻風雨之疾使合而前夫誰

能禦此其氣已足以推鄭人之膽矣悼公之用兵深沉持重若此伯業之復興宜哉

秋楚公子壬夫帥師侵宋

鄭黨於楚宋黨於晉春秋為尊中國攘夷狄作故楚師侵宋以救鄭書侵不書救

九月辛酉天王崩

邾子來朝

冬衛侯使公孫剽來聘晉侯使荀瑩來聘

簡王初崩赴告未徧于列國邾子之朝嗣君魯以大
喪謝而不受在彼得以致事大之敬在我得以致喪
君之哀是為合禮偃然受其朝魯之失也既受邾子
之朝何能卻衛君之聘使重其失矣公方幼冲知不
及此魯秉周禮獨無君子之論哉

按杜預云時王赴
未至故各得行朝

聘之禮原文赴告未徧句已從杜說而下文又以
魯之受朝聘為非豈赴告獨先及魯耶義殊未允

二年春王正月葬簡王

鄭師伐宋

夏五月庚寅夫人姜氏薨

六月庚辰鄭伯睞卒晉師宋師衛甯殖侵鄭

悼公嗣主夏盟一轉移間精采立變非天資絕人不能也而學問之功缺焉未免動之不以禮冒天王之哀而遣使以聘魯乘成公之喪而出師以侵鄭良由習見季世之俗不聞先王之訓故爾不然以公天資之高輔之高明光大之學何桓文事業之足為哉

秋七月仲孫蔑會晉荀罃宋華元衛孫林父曹人邾人

于戚

已丑葬我小君齊姜

叔孫豹如宋

冬仲孫蔑會晉荀瑩齊崔杼宋華元衛孫林父曹人邾人滕人薛人小邾人于戚遂城虎牢

晉累世以來安中國無善政制外寇無成謀至景厲而極悼公一出如潁陰昏霾積久不解長風從西北來盡掃而空之端倪軒豁萬象呈露孰不為之心開

目明疑若鼓少年之雋氣為之而老成持重有諳歷
世故精練兵機者之所不及蓋天下之事專欲者難
成而同欲者必濟好謀者常勝而輕進者必敗楚之
倔强鄭之反覆不可徒以力制據襟喉以操命脉投
肯綮以解臠髀詳慮而熟圖可也故命荀瑩會諸大
夫子戚以盡其謀而城虎牢以偏鄭果得之于孟獻
子事將在齊其畫亦於是定焉謀定事舉如善射者
審固而發應手破的一令而大小國皆集齊亦不敢

不至規模堅凝聲勢震蕩版築之功談笑立辦鄭不敢爭楚不及問而從簡書衛中國之大勢盡為我得鄭由是不攻而自服楚且屈矣書再會于戚以見成謀之定遂城虎牢以見集事之速春秋蓋深壯之楚殺其大夫公子申

三年春楚公子嬰齊帥師伐吳

吳楚自相攻中國之利也楚方簡兵蒐卒組甲被練以向吳而鄭陳已從晉會盟于雞澤矣

公如晉夏四月壬戌公及晉侯盟于長檣

公方在教以名數之年而修始朝之禮晉苟有以撫存之母盟可也盟者忠信之隳禮義之微筮告以此
胚暉虧矣

公至自晉

六月公會單子晉侯宋公衛侯鄭伯莒子邾子齊世子
光己未同盟于雞澤

悼公再同盟也虛打鄭未服齊不至雞澤齊至鄭亦

服陳且請服晉業復興矣思昔踐土之盟鄭背楚而
來陳侯如會盟于王庭以共獎王室號稱伯業之盛
今楚黨轉而為晉如踐土時自非以尊王大義聳天
下人心將不固於是屈單子為諸侯先王室卿士下
與列國相為要結雖非盛世事而用權以濟亦世變
所不得已也第自得諸侯之後會盟凡幾王人不復
下辱蓋芻狗土龍視之矣習俗移人悼雖賢亦不免
乎

陳侯使袁僑如會戊寅叔孫豹及諸侯之大夫及陳袁僑盟

天下之事一利興則一害隨故禮家以別嫌明微為難陳疾楚慕晉而來知去就之義矣袁僑至非後會而殊盟大夫不可與諸侯同軟也內大夫與諸侯盟不譏外大夫與魯公盟必譏今以列國之君及齊世子而盟王卿士已非古義苟使陳大夫俎豆其間不惟卑公卑盟主且卑王室矣此所以諸侯既盟而後

大夫與大夫盟正名分也悼公之思慮精密區處安詳如此然大夫專盟自是開端溴梁大夫盟不以諸侯之大夫書漸替然也使悼公而學禮則所處當更中於嫌微之幾矣

秋公至自會

冬晉荀瑩帥師伐許

鄭陳許皆楚之與也鄭陳既從晉于雞澤許獨不至故有是伐然以許之寡弱迫於鄭而遷葉殆不能以

自存叛服去來何闕輕重知武子勿討可也顯比王
用三驅失前禽前禽聽其自去魯何害其為比哉

四年春王三月己酉陳侯午卒

陳成公卒楚人將伐陳聞喪乃止可謂有禮矣然其
意在於形晉之伐鄭喪激鄭之怨晉伐以回陳鄭之
南非誠于行禮也陳不聽命彭名復侵陳於未葬之
前本心見矣豈非作偽之拙

夏叔孫豹如晉

秋七月戊子夫人如氏薨

穆姜公大母齊姜公母定如公妾母裳衣之分不明
魯於妾母之禮每與正夫人等雖母以子貴而進妾
以僭嫡並侑廟食卑先君矣定如之薨不殯于廟無
櫬不虞所以正嫡妾之分季文子乃怵于匠慶一言
迄用小君之禮葬之執德不弘故為流俗所轉也書
薨葬以夫人小君皆譏

葬陳成公

八月辛亥葬我小君定姒

冬公如晉

陳人圍頓

五年春公至自晉

夏鄭伯使公子發來聘

盟主意嚮之所屬列國指南也鄭聘使不交于魯凡
幾年悼公厚魯以為諸侯表而鄭遂修嗣君之聘使
玉帛之好常通甲冑之戎不起豈非天下之福耶

叔孫豹卽世子巫如晉

仲孫蔑衛孫林父會吳于善道

推赤心置人腹固無中外之間而非我族類亦不容
不過為之防蔑林父先會吳于此而後晉合諸侯與
吳會于戚謹之重之也

秋大雩

楚殺其大夫公子壬夫

大臣法則小臣廉具瞻所在百辟之儀也為國柄臣

背法而徇利是賢否一以賄成則朝綱紊亂吏道垢
濁上下交征利國事去矣公子申為司馬多受小國
之賂楚人殺之及討陳叛曰由令尹子辛實侵欲焉
亦殺之二子任國安危不顧大計唯利是嗜此或不
懲其何以能國申與壬夫之誅不失大夫公子者罪
在專殺不可盡謂楚不刑也記不云乎與其有聚斂
之臣寧有盜臣

公會晉侯宋公陳侯衛侯鄭伯曹伯莒子邾子滕子薛

伯齊世子光吳人鄆人于戚

中國之御外域能使權在我而不在人則闔闢進退
一惟吾聽不要約而固矣雞澤之盟吳以道遠不至
尋請聽諸侯之好於是使魯衛先會之于善道且告
會期彼之意嚮既堅乃始令諸侯與會于戚十三國
玉帛之盛不減桓文吳進趨其間衣冠文物見所未
見雄心悍氣固已陰鑠其七八何彊之足恃悼公慮
事之深處事之當也春秋進吳而人之又序乎鄆之

上豈非以其知中國之尊歟夫齊桓葵丘之會束牲
不軟猶以盟書召陵之師得志乎楚亦以盟書今會
吳而不盟蓋吳之請乎晉者出于情而非偽晉之待
乎吳者一于信而不疑晉悼坦懷以服遠宜無俟乎
盟言以約之也審情偽于善道而推心腹於戚可以
觀御外域之權矣

公至自會

冬戍陳楚公子貞帥師伐陳公會晉侯宋公衛侯鄭伯

曹伯齊世子光救陳十有二月公至自救陳

公至不以會而以救大之也曷為大之大魯不倦于
為義也大魯所以大晉也陳苦楚之侵欲甘心從晉
不召而自會去就審矣楚討其貳已晉命諸侯戍之
楚復致伐晉又合諸侯救之戍以備其不虞救以紓
其急兩役繼舉曾靡告勞悼公之于救災卹患可不
謂勤乎此蓋與救邢城邢同其功而不見其有勉強
之意

卒未季孫行父卒

伊尹之相太甲周公之相成王功成治定必欲告老而去未聞怙勢吝權至死而不釋也行父相魯事必三思而後行見無禮于君若鷹鷂之逐鳥雀及其卒也無衣帛之妾食粟之馬君子蓋稱其忠而魯由之以微者君弱臣強私大權以為已物也且自僖十六年與政至于今七十有七年計其齒當已耄引年謝事退為國老亦何不可者而必吝執國柄死而後已

夫以伊周功業之盛猶不敢居相三君而魯日削乃居之以為安可乎世卿如彼其專執政如此其久魯人知有季氏不知有公諸侯亦惟季氏之是聞其分魯特需時耳安得不于日卒而有感

六年春王三月壬午杞伯姑容卒

夏宋華弱來奔

秋葬杞桓公

滕子來朝

莒人滅鄆

莒女有為鄆夫人者欲立其出公羊傳也立異姓以
蒞祭祀滅亡之道穀梁傳也穆叔覲鄆太子于晉以
成屬鄆又以屬鄆為不利使鄆大夫聽命于會莒人
滅鄆左氏傳也公穀奇於左氏左氏正於公穀何則
滅者亡國之善辭鄆取後于莒以廢其世祀罪在鄆
子豈應獨以罪莒而鄆得善辭鄆恃魯慢莒其為莒
以兵滅明矣況去年鄆世子巫如晉以世子係之鄆

鄆不為無後何為復取諸莒也不信春秋之滅而信公羊之將滅穀梁之非滅不亦好奇之過乎是年齊侯亦滅萊好奇者又將何以為之辭

冬叔孫豹如邾

季孫宿如晉

宿自是交於諸侯矣三世專國君子為魯懼

十有二月齊侯滅萊

一年之間兩小國見滅前所未有莒書人齊書爵齊

侯親滅之也鄆恃魯之賂萊恃賂夙沙衛之謀不知自立以為彊乃欲假人以為固皆有取亡之道春秋哀其愚故書滅

七年春郊子來朝

夏四月三卜郊不從乃免牲

小邾子來朝

城費

孔子曰小人喻於利孟子曰孳孳為利者跖之徒觀

喻與孳孳之辭則知小人勢利之念無一息間斷凡
可以圖得者必百計以求之機關透徹途轍練熟不
以狗苟蠅營為可鄙奴顏婢膝為可惡也故竈可媚
也門可掃也糞可嘗而痔可舐也世之委曲攀援宛
轉附麗以媮媚容悅資其身者不特一昭伯之巧請
城費求媚費宰南遺以自結於季孫而已也上下懷
利以相與故異時遺子蒯遂據費以叛

秋季孫宿如衛

八月螽

冬十月衛侯使孫林父來聘壬戌及孫林父盟

楚公子貞帥師圍陳

十有二月公會晉侯宋公陳侯衛侯曹伯莒子邾子于鄆鄭伯髡頑如會未見諸侯丙戌卒于鄆

鄆之會謀陳也鄭伯為會而來未及與諸侯覲而卒于鄆道病卒也如會致其志也髡頑卒例名也三傳皆謂實弑諱而卒之誣春秋也春秋為亂臣賊子作

賊不討不書葬罪舉國無臣子也鄭伯果以不禮大
夫獨從中國弑而春秋隱之是蔽惡也是縱姦也是
天下之大刑可私宥也一字筆削萬世榮辱安有實
見弑而顧卒之乎彼趙盾弑也而曰不越竟許世子
止弑也而曰不嘗藥至髡頑道病而卒昭昭也而必
曰弑傳者何為故為出入若是乎學者信傳不信經
又從而遷就為之辭深切著明者於是乎迂而晦亂
臣賊子奚懼焉不然弑賊不討鄭僖公何以書葬

陳侯逃歸

經畧天下有權或操而取或縱而舍順勢安行如禹
治水則力不勞而功倍苟挾其勇往直前之氣不顧
人情之逆順強欲握其我從則鯀湮洪水必有扞格
而難濟者悼公之圖諸侯所以急於鄭而不急於陳
也楚之圍陳已解諸侯會鄒方謀所以固陳而陳執
政設詐以恐其君不告而背去常情處此必將忿然
合列國以討逃歸之罪而悼一置度外不復經營豈

野心之難保而鞭長不及馬腹亦恐貽後日之憂舍
逆取順中乎權矣逃者匹夫之行陳侯與鄭伯不盟
首止同其貶

八年春王正月公如晉

夏葬鄭僖公

鄭人侵蔡獲蔡公子變

季孫宿會晉侯鄭伯齊人宋人衛人邾人于邢丘公至

自晉

按左氏公如晉朝且聽朝聘之數會于邢丘使諸侯
之大夫聽命鄭伯獻蔡捷于會故親聽命大夫不書
尊晉侯也其實人大夫乃所以入晉侯也人晉謂何
因魯政之在大夫而知列國之政皆歸之大夫而晉
主乎大夫也時公如晉未返晉不以朝聘之數命之
公而命之季孫季孫聽命于會而後公告至以公為
不足與命也一國之政專於季孫季孫之所欲厚公
不得而薄之季孫之所欲行公不得而尼之故命乎

季孫則朝聘之數可必命乎公不可必也此晉所以命之季孫也晉為盟主修禮率義以倡諸侯而舍君命臣臣倚晉為重得以陵其君君畏晉莫與較而甘心受制于其臣名不正則言不順有國者何恃而立乎人大夫使若微者會而以季孫敵晉侯卑晉甚矣宿繼行父為政一出如晉再出如衛三出遂會晉侯臣行君事視君蔑如盖公室積弱私室積強非一朝一夕之故也

莒人伐我東鄙

國有大而弱有小而強視其所立何如吞舟之魚蕩而失水螻螳得而侮之大固不可恃小固不可易也藐乎之莒魯常為其所侮伐我東鄙我不能報越歲又伐焉復不能報再越歲又侵焉魯豈盡忘其憾哉內制于彊臣外制于大國朝聘會盟無歲不從重以冬蠲旱之相仍公私之俱匱殆猶四肢不仁動靜伸縮非此心所得司也取侮宜哉

秋九月大雩

冬楚公子貞帥師伐鄭

是非可否之論交至于前惟明者能察之剛者能決之商鞅甘龍司馬錯張儀之所以勝負也鄭君年在齒齡何能有剛明之見而一委諸其臣子囊伐鄭三卿欲從楚三卿欲待晉各持一說莫知折衷惟强者是從故子展之論雖確莫能回子駟之鋒而及楚平信義一隳機變百出朝晉暮楚東遮西給曾未知息

肩之所吁謀夫孔多發言盈庭其審所取舍哉厥後
子馬死而子展之謀卒用又以知正論之不可磨

晉侯使士匄來聘

九年春宋災

天火曰災災出于天實人事有以召之在四時夏為
火南訛敬致其有未敬乎在五事視為火視明作哲
其有未哲乎在五常禮為火嘉會合禮其有未盡乎
在五官心為火閑邪存誠懲忿窒慾其有未至乎日

用飲食天理行焉暗室屋漏神明臨焉在我有一之
不極則火必有不得其行者祝融煽禍鬱攸挺變非
無故而然也悼公以宋災問之士弱春秋方富意嚮
方正開其嚴恭自度之心使知應天以實之理此其
機也味為鶉火商主大火士弱不為無博古之學而
國亂諉之無象在道一辭之外曾無以引君於當道
君子惜之

夏季孫宿如晉

五月辛酉夫人姜氏薨秋八月癸未葬我小君穆姜

穆姜以淫僞如徙居東宮事主之禮闕矣自擇美櫝
為櫬與頌琴季文子取以葬齊姜送死之禮微矣夫
人雖失道為臣子者其可失事君母之道乎

冬公會晉侯宋公衛侯曹伯莒子邾子滕子薛伯杞伯
小邾子齊世子光伐鄭十有二月己亥同盟于戲

苗未格而誕敷文德崇未降而退修文教帝王盛節
伯者何足以知之而晉悼猶識此意不以反覆罪鄭

不以馮陵責楚而討其國人惟恐不至修德而遠人
來明政而大國畏誠知服鄭制楚在此不在彼也方
未盟戲之前鄭子展稱晉君方明八卿和睦必不棄
鄭楚子囊亦稱君明臣忠上讓下競晉不可敵其精
神氣燄已足以震耀敵國矣至合十一國伐鄭鄭雖
同戲盟而有異志常人之情必將大肆忿激以求快
知武子乃有我實不德要人以盟之嘆晉侯於是歸
謀所以息民行之期年國乃有節三駕而楚莫與爭

鄭至二十餘年不復貳謙之所以利用侵伐蓋以是也然則折衝制勝之道顧不在堂上乎

楚子伐鄭

十年春公會晉侯宋公衛侯曹伯莒子邾子滕子薛伯杞伯小邾子齊世子光會吳于柤夏五月甲午遂滅偃陽

人之舉事有因失而轉於得者有本是而陷於非者有以失救失以非揜非而終不可回者需自郊而沙

自沙而泥知其進之必窮而不早變也鍾離以諸大夫殊會吳中國之辱也祖以列國之君殊會吳中國之大辱也戚之會進吳稱人以其有慕中國之心也祖之會退吳舉國以其有驕中國之心也其驕奈何晉無以制楚而服鄭於是欲挾吳為重故吳得以驕之坐需諸侯於祖晉帥諸侯而往會志在制人不自知其失已也晉不勝殊會之辱進滅偏陽眇乎小國何足勞十二國之衆欲假偏陽之滅蓋會吳之恥使

若為偃陽而會非為吳而來也偃陽既滅以封向戌
何功而封向戌不受以賜宋公何名而賜獻凱武宮
諱而謂之夷俘且選其族嗣納諸霍人以不絕妘姓
之祀既知非義何以滅為哉蓋以中心有慊隨寓隨
見所謂欲蓋而彌章也悼公謀國最為詳重一涉輕
舉噬臍莫及有常德以立武事信為難歟殊吳於會
加偃陽以滅春秋所以結晉之罪

公至自會

楚公子貞鄭公孫輒帥師伐宋

晉師伐秦

勢有輕重謀有緩急權於輕重使緩急不至於錯施
則動無不中矣楚方樓鄭伐宋晉宜急圖而興師伐
秦以報前侵是急其所宜緩而緩其所宜急也魏絳
教悼公和諸戎以正諸華正欲其專力於楚其可又
挑一敵乎

秋莒人伐我東鄙

公會晉侯宋公衛侯曹伯莒子邾子齊世子光滕子薛伯杞伯小邾子伐鄭

天王黜陟之命不行於諸侯伯主以私怒喜升降會盟之班著僭非一日矣伐鄭之後光以世子進而先四國之君僭抑甚焉然亦有說也齊靈公有輕晉之心第使世子光從諸侯于會又以嬖妾戎子之請欲易世子故晉進光以繫其心且厚其黨定其位也異時仲子謂光列於諸侯不可無故而廢豈非藉晉為

重乎若以先至為盟主所尊何為獨先諸小國之君
又何為毫城蕭魚皆從而先之也夫晉升光序不知
有天王在光尸君位不知有君父在一舉而兩失之
故每惜悼公之賢而不知學

冬盜殺鄭公子駢公子發公孫輒


十二國伐鄭以討背盟從楚之罪虎牢未戍而盜殺
鄭之三卿因見伐而殺也鄭自雞澤同盟方息肩于
晉而楚子囊伐鄭子駢子國子耳欲從楚子孔子矯

子展欲待晉子駟專復竟背晉與楚平於是晉楚之師交至於竟上民不奠居國告病矣今五族作亂殺子駟子國子耳非無主名也而以盜書三卿又不以官書蓋皆主從楚之謀為國厲階人心不與故盜得而戕之也盜一日而戕三卿國無政固可知明年從晉之謀堅定自是二十四年無貳心天其厭亂假手于盜以除鄭之蠱虺歟

成鄭虎牢楚公子貞帥師救鄭公至自伐鄭

升陟而商勝會盟津而周興山川丘陵天設險要已
不知守則人得以扼吭拊背而制其命矣虎牢鄭之險
也前是城虎牢不繫之鄭鄭不能有也今是成虎牢
復繫之鄭諸侯雖城而莫之守復為鄭有也天險得
失闕國重輕虎牢為諸侯所城則鄭帖耳垂首以從
晉盟復為鄭有則待盟境上意氣頽頽矣晉悔前日
之不克守遂因十二國伐鄭而成之成在盜殺三公
子之時乘其亂進而成也義不足以服人而乘亂以

成人之邑豈伯舉哉故楚以救鄭書公以伐鄭至



欽定四庫全書

經部

春秋說卷二十四

至

詳校官通政使_臣夢吉

給事中_臣溫常綬覆勘

謄錄監生_臣徐元秀

謄錄監生_臣馮克鞏

謄錄監生_臣董誠

欽定四庫全書

春秋說卷二十二

宋 洪咨夔 撰

襄公下

十有一年春王正月作三軍

井賦之制四丘為甸甸出甲士三人成公初年作丘
甲丘出一甲則甸出甲士四人士卒牛馬隨甲遞增
魯本三軍陰益而四季孫行父臧孫許叔孫僑如公
孫嬰齊帥師會晉戰於鞏四卿並將其為四軍明

矣夫大國三軍先王之舊制益三而四是為變古合
四而三似非初作也而謂之作何哉三軍之名雖舊
併前日陰益之數分隸其中而萬有二千五百人為
軍之制非舊此所以為作也季文子作丘甲竭民力
以奉國季武子作三軍奪公室以奉私世卿之權愈
重而國愈削矣

夏四月四卜郊不從乃不郊

季孫宿初專政三卜郊不從乃免牲今作三軍三分

公室之後四卜郊不從乃不郊天意厭季氏之日彊而大倣魯也諸侯僭天子大夫僭諸侯其來已久而季氏更舞八佾歌雍徹旅泰山用天子禮樂於大夫之家其未僭者特郊爾上僭之心一萌何所不至祭則寡人公亦未必能有也卜郊不從天之示戒昭昭矣

鄭公孫舍之帥師侵宋公會晉侯宋公衛侯曹伯齊世子光莒子邾子滕子薛伯杞伯小邾子伐鄭秋七月己

未同盟于亳城北

復之頻雖厲而無咎聖人所以開人遷善之門迷而不復則凶矣鄭前是從楚皆迷復今子展主從晉之謀以晉能驟來並合兩國之爭候楚之憊而後堅於從晉故舍之侵宋以致晉師十二國伐鄭鄭即同盟盟已復叛叛已隨會迹雖睽而心之向慕則固不害其為頻復也凡同盟有誠同者有彊同者有陰同者誠同則能久彊同則隨異陰同則終合亳之盟其終

合者歟載書曰無蒞年母壅利母保姦母留慝救災
患恤禍亂同好惡獎王室葵丘五禁不是過鄭人聞
之必洗心易慮投誠委命之不暇而何楚之能奪哉
公至自伐鄭

楚子鄭伯伐宋

公會晉侯宋公衛侯曹伯齊世子光莒子邾子滕子薛
伯杞伯小邾子伐鄭會于蕭魚

鄭習反覆變詐為國隨服隨叛盟猶不賴會安足恃

此其會而不盟者何信在盟前也盟亳雖叛晉伐即成敝楚已極與晉乃固蓋子展之本謀諸大夫之公願國人之真情也夫其背左社而趨諸華出於本謀出於公願出於真情何待盟而後堅赦鄭囚皆禮而歸之納斥候禁侵掠藩牆盡割矣天下之勢此重則彼輕謀國者能使重常在我奚敵國之足慮天保之治內車攻之修政正以是也齊晉更伯以來制楚服鄭之謀凡幾烏合瓦解遠不數歲悼公乃能使鄭二

十四年無貳心夫豈有他奇巧哉約已任賢息民和戎而已子囊謂當今吾不可與晉爭事之而後可敵國心服若此信乎自治之策不可與易也

公至自會

楚人執鄭行人良霄

楚非不彊且譎也今怯晉之彊又墮鄭之譎累年經營一旦盡喪執行人則無策矣然則不德競而力爭未有不屈者

冬秦人伐晉

十有二年春王三月莒人伐我東鄙圍台季孫宿帥師救台遂入鄆

以怨報怨者常過於所施莒自滅鄆以來五年三伐我鄙侮我甚矣曾連年勞役莫克報今甫休息宿於是乎救台入鄆救不可緩入則可已報之過也宿受命救台乘勝徑入無所稟承盖其嗣父當國未嘗親握兵以出既作三軍假此役以收攬兵柄進退作止

國人一委聽焉故書遂以見其專

夏晉侯使士魴來聘

悼公之待與國可謂有禮矣初年謀嗣文襄之業不敢輕動諸侯之兵必使士魴來乞師閱一周星鄭始堅定於是又使士魴來聘且拜師以大役小不以勢行由始迄終一以禮接謙尊而光孰不願為之用乎
秋九月吳子乘卒

吳赴告始通中國魯臨於周廟待以兄弟之國也吳

本泰伯之後至壽夢自王遂併世爵之伯以王法奪之與楚同以子書擯于諸姬欲僭所無反喪所有昭然臣子不安命義之戒其不日不知以日告也

冬楚公子貞帥師侵宋

公如晉

十有三年春公至自晉

夏取郛

義與利不兩立信與詐不並行郛亂分為三師救郛

遂取之假義以出師乘危而滅國季孫宿盜賊之謀也

秋九月庚辰楚子審卒

謚以節惠而壹行楚雖私謚其君不敢苟也靈王不能自克及難於乾谿而謚為靈共王知不德亡師之過請為靈若厲而子囊易以共血氣盡消神明復返審雖知過已晚猶愈於頑冥沉著至死而不悟也

冬城防

魯頻歲從晉于役僅爾少休而入郚取郛存用其民
且興版築之功於防民亦勞止汙可小惕魯民之勞
果何時而惕乎

十有四年春王正月季孫宿叔老會晉士匄齊人宋人
衛人鄭公孫蠆曹人莒人邾人滕人薛人杞人小邾人
會吳于向

有屈必有伸有闔必有闢機至而權行焉善於應變
者也吳敗於楚晉與列國謀之吳人習於前會之偃

蹇安坐於向以待其來范宣子不能堪也於是數吳
伐楚喪之不德以退之既以殺楚之怨又以抑吳之
強屈伸闔闢之機晉蓋得之矣然晉初病楚挾吳以
為聲援則屈已下之晉已服鄭楚不能爭於是挾大
義以退吳勢合於恐懼之初情移於安樂之後權術
反覆春秋不貴也故不沒其殊會之實以示譏季孫
宿叔老皆魯卿君行卿從季武子出會亦以卿從是
以君禮自居也使介並書所以著宿之上僭

二月乙未朔日有食之

夏四月叔孫豹會晉荀偃齊人宋人衛北宮括鄭公孫
莖曹人莒人邾人滕人杞人小邾人伐秦

兵家敗不可以遽沮勝不可以常恃先是晉結吳以
掣楚今吳楚皆折自相為讐晉遂以全力向秦圖釋
前憾得先後之宜矣然衝風不能起鴻毛強弩不能
穿魯縞晉既全制吳楚之勝釋秦以為外懼夫豈不
可否則遣一介以通秦秦必望風來成何以伐為又

否則養威持重使列國得以小休然後俟機而動蓋亦未晚慮不出此糾合十二國並勞之師越險阻以窺彊國及涇不濟遷延無功知種而不知收也悼公興伯之業於是乎稅駕矣

己未衛侯出奔齊

莒人侵我東鄙

秋楚公子貞帥師伐吳

冬季孫宿會晉士匄宋華閱衛孫林父鄭公孫薑莒人

邾人于戚

孟子論貴戚之卿曰君有大過則諫反覆之而不聽則易位又曰有伊尹之志則可無伊尹之志則篡易位以警萬世之為人君者篡以正萬世之為人臣者二義不可偏廢也衛獻公之不道反覆而諫者誰孫林父世執國柄挾晉而陵傲為君所忌故謀先發春秋書衛侯出奔而不名以君雖暴虐非臣下所得而逐也逐君置君一出林父之手而與甯殖相剽以聽

命於諸侯盟主苟以天下分義為任必將大正孫甯之罪而還獻公顧乃號召列國大夫與林父會于戚以謀衛聽中行偃未可得志之譖因剽已立而定之偃即前日與藥書執厲公於匠麗氏者其罪蓋浮於孫甯飾辭以脫其逐君之罪乃所以自為地也悼公此大惡廢大刑長天下臣子無忌憚之氣志於是乎荒矣然則君制其國臣敢奸之遽伯玉為正論其君實甚弗去何為師曠之言雖意在警切實則所有避

回也

十有五年春宋公使向戌來聘二月己亥及向戌盟于

劉

夏逆王后于齊

王后卿逆公監之禮也劉夏非卿也官宜稱大夫而
不大夫爵宜稱子而不子惟繫以邑者是天王之私
昵賜之邑而未爵者也王結婚於齊先賜齊侯環命
為光寵命不以德而以婚夏實將之至此復使逆后

王朝非無公卿大夫可使而獨使夏非其私昵乎后
位坤儷乾奉承宗廟而安天下顧使私昵逆之婚禮
微矣故直書劉夏且不書天王所使

夏齊侯伐我北鄙圍成公救成至遇李孫宿叔孫豹帥
師城成郭

救台李孫行救成公行齊師重於莒臣當其輕君當
其重也公至遇不進齊師退矣齊退而城成邑之郭
為不虞備也異時孔子行乎李孫三月不違以家不

藏甲邑無百雉之城而墮郕費至成獨弗克墮蓋襄
公時所城者三費與防皆不書人惟成以二卿帥師
用民力厚矣然則是城非以備齊乃所以固孟氏藏
姦之窟

秋八月丁巳日有食之

邾人伐我南鄙

冬十有一月癸亥晉侯周卒

晉藥書中行偃使程滑弑厲公逆周子于京師而立

之生十四年矣大夫逆於清原周子曰孤始願不及
此雖及此豈非天乎抑人之求君使出命也立而不
從將焉用君二三子用我今日否亦今日常情處此
非氣奪於弑君之餘鋒則志動於得國之大福非自
折以答羣臣翼戴之勤則自晦以待邦人危疑之定
而公一見逆者出其不意吐出肺肝歸功於天無所
私繫其英氣凜凜逼人雷動而地軸搖風行而海水
立諸大夫震懼退聽不暇已而即位于朝凡所以命

百官者皆培植國本之急務所以任六卿者皆興起人心之至機和我以靖其外息民以安其內於是三駕而楚莫與爭夫以其年不若文公其佐不若桓公而少壯能老成英銳能詳重規模位置駸駸飛度桓文之上此無他欲寡故耳人之血氣未定一為外務所移則志喪而神奪理昏而識蔽天下事無可為者欲寡則虛虛則明明則通治國猶運諸掌耳公方好田一聞虞人之箴而田以時女樂二八方在庭斥其

半以賜謀臣魯無難色車服器用悉從節約而朝聘
有定數不過求於列國得寡欲之道矣若其始不能
正弑君之大僂終不能行逐君之大誅會王室卿士
以重初年之盟方假而遽歸之大節目所在因循曠
失蓋方寸本來之明無與發之也故嘗謂春秋二百
四十二年之君唯悼公可與有為惜乎不知尊德性
而道問學

十有六年春王正月葬晉悼公三月公會晉侯宋公衛侯

鄭伯曹伯莒子邾子薛伯杞伯小邾子于溴梁戊寅大
夫盟

禮樂征伐天子不能有降而自諸侯出諸侯不能有
降而自大夫出大夫非遽敢干諸侯也諸侯不知有
天子則大夫不知有諸侯也況古者有公盟無私盟
盟出於列國相與要結之私不復關白於王朝在諸
侯既絜矩非其道則內大夫敢於盟與國之君外大
夫敢於盟公君臣之陞級始夷矣君臣之陞級既夷

積而至於諸侯同盟諸侯之大夫又盟以諸侯之盟
不足恃大夫之盟為可恃也然猶可諉曰諸侯命大
夫而盟也至此大夫無所稟命而自盟無用乎諸侯
之盟矣夫陽剝非一日而剝冰堅非一朝而堅陵夷
之勢積漸日甚春秋深懼焉若曰信在大夫可以論
雞澤之盟不可以論溴梁之盟是盟直不臣耳悼公
於弑君逐君之罪一置不問故列國之大夫皆相視
動無君之心平公之卑悼公之為也悼公崇用執弑

厲公之中行偃權勢日盛遂使列國之大夫自為盟
平公無如之何也若夫速葬以會諸侯而無哀戚之
心則平公之罪

晉人執莒子邾子以歸

悼公在位十有六年未嘗有所執而晉日彊信義孚
於人心威令不待執而自行也平公嗣立典刑未遠
溴梁之會十國皆至苟能懷之以禮約之以義維之
以信誰敢有貳心使有貳心因其來會而調劑彌縫之

之使泯其欲貳之迹吾則退修德政以彊吾國國勢
張則大如齊楚亦將震服況蕞爾之邾莒乎慮不出
此顧一舉執兩國之君以歸欲示威於諸侯悼公之
業不克紹可知矣

齊侯伐我北鄙

按自此至襄公三十一年永樂大典並闕今祇錄經文

夏公至自會

五月甲子地震

叔老會鄭伯晉荀偃衛甯殖宋人伐許

秋齊侯伐我北鄙圍郕

大雩

冬叔孫豹如晉

十有七年春王二月庚午邾子貜卒

宋人伐陳

夏衛石買帥師伐曹

秋齊侯伐我北鄙圍桃高厚帥師伐我北鄙圍防

九月大雩

宋華臣出奔陳

冬邾人伐我南鄙

十有八年春白狄來

夏晉人執衛行人石買

秋齊師伐我北鄙

冬十月公會晉侯宋公衛侯鄭伯曹伯莒子邾子滕子

薛伯杞伯小邾子同圍齊曹伯負芻卒于師

楚公子午帥師伐鄭

十有九年春王正月諸侯盟于祝柯

晉人執邾子

公至自伐齊

取邾田自濶水

季孫宿如晉

葬曹成公

夏衛孫林父帥師伐齊

秋七月辛卯齊侯環卒

晉士匄帥師侵齊至穀聞齊侯卒乃還

八月丙辰仲孫蔑卒

齊殺其大夫高厚

鄭殺其大夫公子嘉

冬葬齊靈公

城西郭

叔孫豹會晉士匄于柯

城武城

二十年春王正月辛亥仲孫速會莒人盟于向

夏六月庚申公會晉侯齊侯宋公衛侯鄭伯曹伯莒子邾子滕子薛伯杞伯小邾子盟于澶淵秋公至自會仲孫速帥師伐邾

蔡殺其大夫公子燮蔡公子履出奔楚

陳侯之弟黃出奔楚

叔老如齊

冬十月丙辰朔日有食之

季孫宿如宋

二十有一年春王正月公如晉

邾庶其以漆閭丘來奔

夏公至自晉

秋晉欒盈出奔楚

九月庚戌朔日有食之冬十月庚辰朔日有食之

曹伯來朝

公會晉侯齊侯宋公衛侯鄭伯曹伯莒子邾子于商

任

二十有二年春王正月公至自會

夏四月

秋七月辛酉叔老卒

冬公會晉侯齊侯宋公衛侯鄭伯曹伯莒子邾子薛伯
杞伯小邾子于沙隨公至自會

楚殺其大夫公子追舒

二十有三年春王二月癸酉朔日有食之

三月己巳杞伯匄卒

夏邾畀我來奔

葬杞孝公

陳殺其大夫慶虎及慶寅陳侯之弟黃自楚歸于陳

晉欒盈復入于晉入于曲沃

秋齊侯伐衛遂伐晉八月叔孫豹帥師救晉次于雍榆

己卯仲孫速卒

冬十月乙亥臧孫紇出奔邾

晉人殺欒盈

齊侯襲莒

二十有四年春叔孫豹如晉

仲孫羯帥師侵齊

夏楚子伐吳

秋七月甲子朔日有食之既

齊崔杼帥師伐莒

大水

八月癸巳朔日有食之

公會晉侯宋公衛侯鄭伯曹伯莒子邾子滕子薛伯杞

伯小邾子于夷儀

冬楚子蔡侯陳侯許男伐鄭

公至自會

陳鍼宜咎出奔楚

叔孫豹如京師

大饑

二十有五年春齊崔杼帥師伐我北鄙

夏五月乙亥齊崔杼弑其君光

公會晉侯宋公衛侯鄭伯曹伯莒子邾子滕子薛伯杞伯小邾子于夷儀

六月壬子鄭公孫舍之帥師入陳

秋八月己巳諸侯同盟于重丘公至自會

衛侯入于夷儀

楚屈建帥師滅舒鳩

冬鄭公孫夏帥師伐陳

十有二月吳子遏伐楚門于巢卒

二十有六年春王二月辛卯衛甯喜弑其君剽衛孫林父入于戚以叛甲午衛侯衎復歸于衛

夏晉侯使荀吳來聘

公會晉人鄭良霄宋人曹人于澶淵

秋宋公殺其世子痤

晉人執衛甯喜

八月壬午許男甯卒于楚

冬楚子蔡侯陳侯伐鄭

葬許靈公

二十有七年春齊侯使慶封來聘

夏叔孫豹會晉趙武楚屈建蔡公孫歸生衛石惡陳孔

與鄭良霄許人曹人于宋

衛殺其大夫甯喜衛侯之弟鱄出奔晉

秋七月辛巳豹及諸侯之大夫盟于宋

冬十有二月乙亥朔日有食之

二十有八年春無冰

夏衛石惡出奔晉

邾子來朝

秋八月大雩

仲孫羯如晉

冬齊慶封來奔

十有一月公如楚

十有二月甲寅天王崩

乙未楚子昭卒

二十有九年春王正月公在楚夏五月公至自楚

庚午衛侯伋卒

閭弑吳子餘祭

仲孫羯會晉荀盈齊高止宋華定衛世叔儀鄭公孫段

曹人莒人滕人薛人小邾人城杞

晉侯使士鞅來聘

杞子來盟

吳子使札來聘

秋九月葬衛獻公

齊高止出奔北燕

冬仲孫羯如晉

三十年春王正月楚子使薳罷來聘

夏四月蔡世子般弑其君固

五月甲午宋災宋伯姬卒

天王殺其弟佞夫王子瑕奔晉

秋七月叔弓如宋葬宋共姬

鄭良霄出奔許自許入于鄭鄭人殺良霄

冬十月葬蔡景公

晉人齊人宋人衛人鄭人曹人莒人邾人滕人薛人杞人小邾人會于澶淵宋災故

三十有一年春王正月

夏六月辛巳公薨于楚宮

秋九月癸巳子野卒

己亥仲孫羯卒

冬十月滕子來會葬

癸酉葬我君襄公

十有一月莒人弑其君密州

欽定四庫全書

春秋說卷二十三

宋 洪咨夔 撰

昭公一

元年春王正月公即位

日月出而燭火熄雷霆奮而陰沴消君德之賢明威重權臣所甚畏也故必擇昏庸而易欺便黷而易制者君之李斯不利於立扶蘇而立胡亥梁冀不利于立清河而立蠡吾王莽不利于立王侯長大者而立

孺子蜉蝣出陰鵩梟鳴夜而天下大權盡歸其手或
幸而不至於凡下則又以仇士良故智百方蠱之使
氣移體變而不自知翻乾簸坤出沒神鬼欺離紹竊
惟意所為蓋千古一轍也襄公薨子野嗣立而卒齊
歸之子公子稠居喪而不哀在慼而有嘉容其童心
國人莫不知之穆叔謂不度之人鮮不為患若果立
之必為季氏憂武子不聽卒立之比葬三易衰其不
度蓋季氏之所利也異時以輕躁出之鄆棲之乾侯

往來齊晉經營復入不可得而客死季氏之所利者
於是乎遂矣嗚呼託六尺之孤寄百里之命果如是
乎

叔孫豹會晉趙武楚公子圍齊國弱宋向戌衛齊惡陳
公子招蔡公孫歸生鄭罕虎許人曹人于虢

會于宋序趙武屈建盟于宋一諉之諸侯大夫而不
序蓋會之時晉先于楚猶如故盟之時楚始先歆尸
盟諸夏權歸強楚不忍復序也今會于虢乃仍序趙

武于公子圍之上如會宋時蓋會盟于宋有異禮號
雖舊書加牲楚欲尋舊轍以軋晉然用會宋之禮不
用盟宋之禮晉猶不失其尊也而聖人所憂者不在
荆楚在中國漢梁大夫盟之後澶淵商任沙隨夷儀
重丘諸侯猶以位序見至會宋盟宋之後諸侯掃跡
城杞者諸大夫會澶淵者諸大夫會號者亦諸大夫
名分不正紀綱不張楚于是窺見諸夏之亡君尋大
會諸侯及淮夷于申用齊桓召陵故事而荆楚擅中

國矣是會趙武以為功春秋以為罪

三月取鄆

莒魯爭鄆久矣疆場一彼一此何常之有似不必深責其取也而莒人弑君纔數月魯能聲罪致討則義明而威立何至乘亂幸禍為鼠竊狗偷計見小利而忘大義瀆盟伐國幾墮楚手豈不甚可羞哉

夏秦伯之弟鍼出奔晉

兄弟異幹而同根知孝則知友矣景公不能存其弟

以慰母心何耶鍼雖寵汰聞其母懼選之訓幡然出
奔猶未至悍戾而不知過公誠能擇師傅以導之明
禮義以示之可使折節就繩墨脊令之原不寒鴈鳩
之愛常壹斯免戾于春秋矣

六月丁巳邾子華卒

晉荀吳帥師敗狄于太原

凡敗某師皆以權數變詐取勝荀吳出堂堂之師與
狄遇于太原舍先王車攻之法而崇卒誘之以拒角

薄之于未陳當在善戰服上刑之科昔悼公修文襄
之業無終子嘉父因魏莊子納虎豹之皮以請和諸
戎卒蒙其利平公繼之君臣以玩愒苟偷為政尸盟
大權拱手授楚而區區與小醜校一日之勝負今日
所敗之無終及羣狄即前日所和之無終與諸戎雖
以詐勝難于力服中外離心誰為我用晉自是益不
競矣

秋莒去疾自齊入于莒莒展輿出奔吳

莒人弑其君而展與立展與雖非手弑立不討賊失
君國之道矣齊納去疾而展與出奔去疾繫之莒展
與不繫之子人心戴之則為君去之則為獨夫豈不
凜乎其可畏哉

叔弓帥師彊鄆田

乘時射利者匹夫之行魯乘莒君之弑而取鄆又乘
莒君之奔而彊鄆田季氏自以為得射利之機矣間
人之危幸人之禍而覆出為惡春秋以取鄆彊鄆繼

書之利故也

葬邾悼公

冬十有一月己酉楚子麇卒楚公子比出奔晉

舍經信傳學者之通患也鄭伯卒于鄆其卒明矣左氏則謂子駟使賊弑僖公而以瘡疾赴楚子麇卒其卒亦明矣左氏則謂公子圍入問疾縊而弑之亦以瘡疾赴春秋以公天下為心楚雖蠻夷其弑願弑虔皆直書無隱何所私於圍而故脫之實卒非弑也圍

動無君之心固非一日因郊敖以病沒殺其二子而奪之位公子比于是出奔觀共王之子圍為長一語伍舉雖巧為覆護其惡自不容揜何待加之弒而後知其惡哉公羊穀梁不言弒左氏獨言之此之謂失之誣

按此條公穀無文而穀梁昭三年執齊慶封傳有楚公子圍弒其兄之子而代之為君之語考

康王靈王皆楚共王庶子郊敖康王子則穀梁亦以廩卒為弒也原文失考謹訂于此

二年春晉侯使韓起來聘

夏叔弓如晉

秋鄭殺其大夫公孫黑

時黑將作亂馮氏與諸大夫欲殺之子產使吏數以
三罪而縊可謂當其罪矣而黑不失其為大夫與公
孫者殺出于馮氏及諸大夫之謀雖以子產之賢亦
未嘗稟承君命正其當殺之罪也吁諸侯毋專殺大
夫而大夫乃擅殺大夫世變豈不重可嘆哉

冬公如晉至河乃復季孫宿如晉

季世諸侯之事盟主率以過禮為勤文公卒魯始會

葬不書其人是時猶用大夫送葬之常制至襄公卒
書公子遂如晉葬卿共葬事是一變也景公卒公親
往弔且逾年留送其葬是再變也平公嬖寵少姜卒
公親往弔及河而還是三變也每變輒下卑弱已甚
雖士文伯以非伉儷陽敬來辭而季孫往致襚服則
安受之是重在季孫之來不以公至為重也春秋比
書其事晉人抑揚之意魯君臣輕重之實昭昭矣吁
禮人不答反其敬公盍退而痛念見卻之辱收斂童

心飭厲君德使人改聽易視起敬起畏以弭權彊偏
逐之禍也

三年春王正月丁未滕子原卒夏叔弓如滕五月葬滕
成公

秋小邾子來朝

八月大雩冬大雨雹

董仲舒謂諸雹皆有所漸脅之象劉向謂盛陽雨水
溫煖而湯熱陰氣脅之不相入則轉而為雹大雨雹

為季氏脅君之象無疑也而雹繼旱禱之餘則陰陽戰矣蓋公雖童心猶在受制權臣常有不能堪者季氏強以力軋之陽方與陰違陰遂與陽薄故旱雹相仍以示變而終于陰勝也申豐諉之藏冰不用而不及乖沴愆伏之本其阿世之言歟

北燕伯欵出奔齊

春秋為扶植綱常而作凡書國君出奔君臣交貶也何則君不君而後臣不臣則君宜貶君不君而臣不

可以不臣臣可逐君乎燕簡公多嬖寵欲立之大夫
比而殺其外嬖遂懼而出奔為人君不能守宗廟社
稷至為強臣凌逼而出故名之以聳天下後世之為
君者而君以偏奔諸大夫之罪亦昭然暴白矣

四年春王正月大雨雪

僖大雨雪公羊以為雹此大雨雪左氏以為雹雪者
陰陽之和雹者陰陽之戾固不同然雨暘寒燠過皆
為災凡以大書其厲民暴物可知矣雪雖有霑足優

渥之功而春非其時況至于大乎

夏楚子蔡侯陳侯鄭伯許男徐子滕子頓子胡子沈子
小邾子宋世子佐淮夷會于申楚人執徐子

楚以宋盟求諸侯于晉晉舉而予之靈王遂合十一
國及淮夷于申楚人得志于中國莫盛于此矣叔向
先是有言公室今亦季世政在家門民無所依君日
不悛以樂愒憂是知晉之君臣以淫偷為苟且歲月
之計雖不以諸侯與楚安能禁楚之自會乎楚人之

彊非其自能彊皆中國不自彊召之也然自盟宋以
來宜若列國謹趨于楚而歷考是會陳蔡許徐頓胡
沈淮夷皆素屬于楚者鄭亦兩屬之舊所能來者小
邾及滕而齊魯衛邾杞初未嘗往宋惟以世子行以
此見人心豈甘為強大之從苟有以維之孰肯舍喬
入幽哉聖人不忍中國之皆為楚諸侯悉以爵見所
以致其別于淮夷楚子執無罪之徐子既爵而人之
又所以存徐也

秋七月楚子蔡侯陳侯許男頓子胡子沈子淮夷伐吳
執齊慶封殺之遂滅賴

義利之不兩立若白黑然楚伐吳殺慶封似為義也
遂滅賴則蒙義以規利盜跖之心見矣方齊崔慶同
惡相濟以賂追討自以為泰山之安天假手于盧蒲
嫫以滅杼而封出奔吳受封邑之朱方富踰其舊使
非天又假手于圍執而僂之則無君稔惡者皆可長
保富貴是無人極也封雖非圍所得討以賊討賊賊

何所逃殺封盡滅其族人心方為之一快而移師滅
賴果何名乎徐既以無罪執賴復以無名滅天又將
稔其惡為討篡夷凶之地歟觀書伐書執書遂滅可
見凶焰勃勃乎其莫遏也

九月取鄆

莒昔滅鄆今取莒之鄆也莒之侮魯嘗甚矣魯前年
取鄆今年取鄆報莒抑甚焉而意猶未已也春秋所
以貴於釋仇而弭怨

冬十有二月乙卯叔孫豹卒

穆叔以深目顴喙之夢而嬖豎牛餒死于牛之手立庶子嫪而相之昭子即位朝其家衆曰牛禍叔孫氏使亂大從罪莫大焉必速殺之牛懼奔齊孟仲之子殺諸塞關之外仲尼曰叔孫昭子之不勞不可能也嗚呼懷私恩而泯大義甘已榮而忘親辱後世皆是也安得如昭子者與之共論亂臣賊子之情哉

五年春王正月舍中軍

魯大國本三軍季文子不恤其民丘使出甲陰益為四而軍制始壞季武子不恤其國縮四為三三分公室各有其一季氏盡征之猶未屬廢也又舍中軍而四分之季氏擇二二子各一皆盡征之而貢于公由四而三由三而兩季氏遂有魯國之半軍制愈縮公室愈卑何復古復正之有哉自昔權臣以得兵為重季孫四分公室擇取其二不惟魯君垂命掌握三家強弱之勢分蓋為吞噬叔仲之地矣朶頤方急安知

陽貨已眈眈乎其後哉

楚殺其大夫屈申

公如晉

夏莒牟夷以牟婁及防茲來奔

秋七月公至自晉

戊辰叔弓帥師敗莒師于蚡泉

招亡納叛魯為遁藪又遣將以詐敗莒師嘻其甚矣
季氏為國巧可以得地則巧無不為詐可以得勝則

詐無不施力可以得國則力無或遺少焉南遺叛陽
虎專而三家日微智力于是乎窮矣

秦伯卒

冬楚子蔡侯陳侯許男頓子沈子徐人越人伐吳

楚仍歲伐吳者三好戰必亡天稔其釁矣春秋之待
夷狄不一而足其終始凡三變每變益怨怨之深即
憂之深也楚吳越皆以僭王得罪于春秋州不如國
國不如人蓋嚴其進也故楚初以州見繼以國見然

後以人見吳則不復以州見即以國見視楚怒矣越
既不以州見又不以國見即以人見視吳為又怒聖
人豈輕于進之哉世變然也楚之方興齊晉迭伯攘
夷尊夏規模整密召陵城濮之役力過而深挫之其
進艱矣吳之方興晉雖嗣伯未免假吳以制楚其進
宜易于楚也逮越之通中國晉之君臣惴淫苟偷無
志于振文悼之紫越遂依楚逕造而橫行其進又易
于吳矣觀三國之進有難易而吾諸夏之輕重强弱

皆可推見宜聖人憂世之心殆有日甚一日者

六年春王正月杞伯益姑卒

杞文公再從夷儀之會皆以伯序至城杞之年來盟
黜而為子今稱伯以卒則嘗復之矣王室以大公為
政賞罰悉當于功罪則進退諸侯權皆我出何至九
年之間予奪僅行于蕞爾之杞耶

葬秦景公

夏季孫宿如晉

葬杞文公

宋華合比出奔衛

人君生長深宮日與宦寺為密信之而不疑外廷之
無恥者又自結于內廷表裏鉤聯彼此符應以肆欺
君罔上之謀何可勝計宋平公前以寺人伊戾而殺
太子痤後以寺人柳而逐大夫華亥為證又同使公有
其視之信有又同其援向戌華亥為證又同使公有
一縷之明鑒往懲來孰敢復襲已烹之故智而前後

膚受浸潤之行若出一轍懵然不悟豈非所謂迷復之凶乎不寧惟是太子佐以華合比之故惡柳欲殺之及居喪柳熾炭于室將至而去之比葬又有寵柔佞便辟之移人如此哉夫柔佞便辟以固上寵膚受浸潤以行已謀此固宦官女子之常而為縉紳者乃俯首交結甘心附和以苟一旦之富貴妻妾不羞于墻間者幾希可以觀世道矣

秋九月大雩

楚遂罷帥師伐吳

冬叔弓如楚

齊侯伐北燕

亂臣賊子以賂免三綱絕矣夷考其所以賂亦隨世
為之變宋督弑君桓公取郕大鼎于宋是以寶賂也
宣公篡位求定齊人取濟西田是以地賂也至衛人
弑君復君晉平公執衛侯衛以衛姬歸乃釋之是以
色賂也地賂重于寶色賂密于地人欲橫流以貪濟

淫何所不至哉今齊景公伐北燕討逐君之罪晏子
固以吾君賄為憂燕人以燕姬歸而求成果不克而
還則平公所以待衛者也嗚呼出乎爾者反乎爾宜
其涕出而女于吳

七年春王正月暨齊平

魯政在三家公室四分齊何所畏于我而急急求平
哉齊魯皆季世景公棄其民民歸陳氏與魯君昏淫
民歸三家事正同公昏于吳與齊女吳亦相先後兩

弱之勢自相携扶盡釋前憾共圖休息故為是平及者我求于人之辭暨者人已交相求之辭此叔孫婼所以即如齊涖盟也

三月公如楚

國勢不能自立而左牽右掣惟人是從魯君臣所以交轍于齊楚也前是楚會諸侯于申公不果往知去就之義矣章華之臺成願與諸侯落之遂啟彊脅公以如楚孟僖子不能相禮前無是禮也楚方日彊晉

方日偷魯但欲彌縫一時之闕以納交免禍如非所
宜如賀非所當賀皆不暇禮之間禮亡而國隨之魯
安得不削

叔孫婁如齊涖盟

夏四月甲辰朔日有食之

秋八月戊辰衛侯惡卒

九月公至自楚

冬十有一月癸未季孫宿卒

凡日食皆陰侵陽之咎晉平公問誰當之士文伯不以正對謂衛君大惡魯將上卿而衛侯季孫相繼卒信有徵矣然宿為人臣而可當日乎蓋其專政于魯國人事之如君列國亦待之如諸侯也方武子寢疾螭固不說齊衰入見以示不畏及其喪也曾點倚其門而歌以明不與舉國君之二賢獨守禮不屈豈非國脈所恃以僅存歟

十有二月癸亥葬衛襄公

欽定四庫全書

春秋說卷二十四

宋 洪咨夔 撰

昭公二

八年春陳侯之弟招殺陳世子偃師夏四月辛丑陳侯溺卒

凡以弟書皆兄有愛弟之心也招前會後放皆稱公子其殺世子乃稱弟何哉兄有愛弟之心而弟不弟也怙兄之寵殺兄之嫡而迫兄於死社稷為墟招之

罪不勝誅矣夫愛弟者天倫之至情豈料其伎毒至此極然亦知愛而不知教之過也

叔弓如晉

楚人執陳行人干徵師殺之陳公子留出奔鄭

陳之罪在招而干徵師無罪見殺故不失其為行人招殺世子而立留留為賊所立聞楚殺行人而出奔故以公子書不以君書

秋蒐于紅

春蒐夏苗秋獮冬狩禮也魯嘗大閱嘗狩未嘗苗秋
舉蒐禮固非其時簡習車徒亦有國者不容廢然中
軍既舍四分公室季氏擇二二子各一皆盡征之而
貢於公公無民矣民各有屬兵各有主人私其私權
不相統雖事晉平齊昏吳好楚可以苟目前之安不
容不聯合卒乘參會御右而同簡之為有事之備自
根牢至于商衛革車千乘皆三家之兵也閱宮之詩
曰公車千乘朱英綠縢二矛重弓公徒三萬貝冑朱

縵烝徒增增是蒐也車徒尚安有公哉故不書公

陳人殺其大夫公子過

大雩

冬十月壬午楚師滅陳執陳公子招放之于越殺陳孔
與葬陳哀公

公子過孔與招之黨也陳人殺過過固有罪哀公既
卒嗣子又奔無君命而擅殺所以不失其爵也楚殺
行人又殺孔與而賊殺世子之招則執而放之于越

鯨鯢脫網蛙黽是錄其失刑可知况又乘人之危滅其國以為已利楚圍實穿窬之雄也陳滅而哀公葬于以見人心未去國脉猶存滅而不滅聖人蓋幸之九年春叔弓會楚子于陳

許遷于夷

夏四月陳災

許以大獄之後屢垂亡而不亡陳以顓帝之族再就滅而不滅所馮者厚也楚子乘公子招之亂滅陳使

穿封成為公則陳已不復存而會繫之陳災繫之陳
何耶齊人既滅遂又殲于遂蓋滅非其罪國人猶有
自相保聚不願為齊之從而存遂者故復以國見陳
之復見亦此類也天未厭陳民未去陳雖以力滅之
安得終滅之裨竈謂五年陳將復封蓋知天而不知
人者

狄仲孫獲如齊

冬築郎囿

齊王之囿民以為大魯誠何時而用民力於築囿季
平子欲速成叔孫昭子欲勿亟昭子蓋未測平子之
心也中軍未舍之前公猶有餘民自四分公室而民
盡去公雖童昏安能無幾微見於辭色季孫欲鼓舞
其欲而消磨其不平於是治園囿以奉遊觀使之玩
耳目之細娛不知贅旒弁髦之為辱而國移矣賦芋
以博狙喜哺果以過兒啼此其術也否則彼何愛於
君俾有臺池魚鳥之樂哉

十年春王正月

夏齊樂施來奔

齊景公流連多慾淫於刑而吝於施是為陳氏毆民也惠樂高誠知惡陳宜兢厲戒懼圖所以陰制潛禦之術而怙其富彊昏於酒內不知怨之積禍之發樂施奔而陳始大矣晏平仲切切乎齊將為陳之憂苟求兩家兵爭之釁聳其亂國之罪倡國人併逐之豈非興起公室之機會聽樂之奔助陳之大君子是以

知其無勇也

秋七月季孫意如叔弓仲孫纘帥師伐莒

作丘甲之後四卿並將以伐齊大國三軍陰益而四
矣中軍既舍三卿並將以伐莒名為二軍而實三也
季氏將所有四分其國之二叔仲氏各將四分其國
之一三家鼎峙不相統屬人帥所私共為是役合而
蒐分而將勢利密而情義踈同室參商矣此三桓子
孫之所以微

戊子晉侯彪卒九月叔孫婁如晉葬晉平公

十有二月甲子宋公成卒

十有一年春王二月叔弓如宋葬宋平公

夏四月丁巳楚子虔誘蔡侯般殺之于申楚公子棄疾

帥師圍蔡

陳夏徵舒弑其君中國不能討而楚討之齊廢封黨

崔杼弑其君中國不能討而楚討之蔡世子般弑其

君中國不能討而楚討之天下大惡無終遁之理天

故假手於楚也楚子殺般般罪當討而生名度者何
故以利心討之也義利之相去不能一髮而舜跖分
焉度奉孫吳以討陳曰將定而國陳人聽命而遂縣
之今又以甘言厚幣誘蔡侯醉而執殺之命棄疾圍
蔡事雖義而心則利以巧用詐以詐濟貪東紿西罔
謂莫已智而不能揜天下之耳目誘之一辭春秋所
以原心而定罪

五月甲申夫人歸氏薨

大蒐于比蒲

公室無一民間歲再蒐皆三家之衆也前止以蒐書
今乃以大蒐書蓋蒐特大夫用諸侯之禮蒐至於大
則大夫用天子之禮矣八佾雍徹無非僭天子之禮
然不過誇耀其家人大蒐則表表然與國人公之無
忌憚一至此尚望其忌君母之喪乎桓公大閱以諸
侯僭天子三家大蒐以大夫僭天子春秋為扶植綱
常而作蓋深痛之也

仲孫矧會邾子盟于祲祥

德不孤必有鄰修諸已者無關人將觀而化慕而來
不期親而自親矣否則寡助之至親戚亦叛安能強
人附我乎公立以來君臣如晉如楚如齊如宋如滕
無虛歲與國無一介之跡涉魯庭者且十年邾自昔
屢朝于魯今亦見侮不復至孟僖子至往會于祲祥
以修好禮我無以來之宜輕於鴻毛矣

秋季孫意如會晉韓起齊國弱宋華亥衛北宮佗鄭罕

虎曹人杞人于厥慙

晉自重丘之後諸侯不會者十八年虢之後諸大夫
不會者十年而諸夏皆奔走于楚晉君惱淫而臣苟
偷不復念伯業之紹矣陳滅不能救蔡圍又不能救
昭公初立韓宣子勉強為厥慙之會以謀救蔡而終
不能以此見政柄倒執未有能彊其國者是會序大
夫無譏辭不足譏也不屑之教誨也

九月己亥葬我小君齊歸

易言十年乃字十年勿用天有十日周則必變也公
在襄公之喪宜感而有嘉容今母夫人之葬仍不知
感童心雖越十餘年猶在此而不變終不變矣故曰
下愚不移

冬十有一月丁酉楚師滅蔡執蔡世子有以歸用之
弑君之賊在官在宮者殺無赦蔡般遺孽楚執以歸
猶以世子繫之國者諸侯無伯強暴恣行久圍堅守
力窮勢屈見滅於以亂治亂之度而莫之救為可哀

也宋襄圖伯用鄫子于睢社而不得其死楚靈滅國
用隱太子于岡山而不得其死魯伐莒獻俘始用人
于亳社春秋雖諱不書而公亦不得其死淫鬼不靈
何福可邀山與社皆聰明正直而壹者牲人以要福
神其福之乎

十有二年春齊高偃帥師納北燕伯于陽

入者歸之易納者歸之難北燕伯奔齊以避諸大夫
之偪出名而納不名其納之正邪非也齊為義不終

行大事不以信使燕伯失所歸也先是景公親伐燕以納簡公取賂而還今命將以納非復親伐之勤雖可以返諸國都牽於賂已之私僅納之陽以塞其請而已信義安在哉異時取鄆居公即此意

三月壬申鄭伯嘉卒

夏宋公使華定來聘

公如晉至河乃復

善鄭以勸來者猶懼不旣況不禮焉鄭不來矣周桓

公為鄭言也敬以逆之猶懼其貳又卑一睦焉逆羣
好也魯穆叔為小邾言也周之於鄭魯之於小邾小
不加敬已有不來之懼魯豈卑於邾鄭而晉卻之又
卻之耶魯為諸夏之望盟主經營糾合之功常以得
魯為重今至河輒卻是公之昏弱不足為江湖鳬鴈
之多寡晉無志於伯亦不以機心一生海鷗不下為
憂也

五月葬鄭簡公

楚殺其大夫成熊

秋七月

冬十月公子愁出奔齊

權彊之難去甚於負嵎之虎非赤手所能搏也齊樂施高彊惡陳氏不能克而奔魯魯南蒯公子愁謀季氏不能克而蒯以費叛愁奔齊智小而謀大故施與愁之曠宗失位略同而陳氏季氏之禍其國亦略同然愁愛公室之心則可亮也

楚子伐徐

晉伐鮮虞

君子以信義為主小人以機詐為功晉荀吳舍車崇
卒出奇用詐敗狄于太原今復用滅虢之故智偽會
齊師假道于白狄別種之鮮虞遂入昔陽滅肥信義
一隳機詐百出而文襄之霸業衰矣况桓文之伯以
攘楚為大務狄雖小出跳踉悉置不治服其大則小
當自斃也晉伯業日衰楚求諸侯而麋至求昏而薦

女滅陳滅蔡拱睨不之救而又伐徐其橫極矣晉方
且汲汲惟狄之是治尚為知務乎伐徐楚以爵舉伐
鮮虞晉以國舉致楚之橫皆晉之為故深致其貶
十有三年春叔弓帥師圍費

季友賢行父材宿狡意如愚四世相承根據蟠結非
有剛明之君忠智之臣協力共濟盛陰非衰陽所能
決也南蒯與叔仲小公子愁謀去季氏而歸其室于
公愁告公遂從公如晉公盍聞其謀矣使天祐魯因

其族黨內離家臣外叛一舉而拔盤錯以張公室豈
非至幸而君德不强臣謀匪正蒯懼不克遂以費叛
徒能亂其國而已費不以叛書者公與聞其謀是叛
季氏非叛公也叔弓圍費為季氏討耳其後公山弗
擾又以費叛季氏不能自遏其無君之心安能遏陪
臣無季氏之心哉

夏四月楚公子比自晉歸于楚弑其君虔于乾谿

按左氏楚虔篡立比奔晉者十三年以召而歸初無

心於歸也脅盟于鄧而入楚蔡公殺虔二子推比為
王亦無心於王也棄疾先除王宮使觀從告乾谿之
師先歸者復所師潰而王縊又無心於弑也無心於
歸無心於王又無心於弑而以弑書春秋豈輕加人
以大惡之名哉觀自晉一辭則為有心矣衛侯鄭自
楚復歸于衛楚有奉焉爾衛元咺自晉復歸于衛晉
有力焉爾凡書自皆挾有力之奉而入非有挾則不
能入也比挾晉返楚因與羣失職之族仇憾之黨相

表裏而自立據虔巢穴翦虔羽翼使進無所容退無所歸而死夫殺人以刃與挺其為殺同迫而置之死地不可謂不弑也或疑比未嘗臣虔不當言弑虔非同氣之兄乎聖人耳目所接其記比之有挾而歸篡謀已定委折情節本末具備惟經質而傳文故學者舍經任傳遷就其說以求合於經而辭多費能畧傳而折諸經則知簡嚴易直之旨矣

楚公子棄疾弑公子比

聚衆蠱于一器其獨存于搏裂噬嚙之餘者必毒之
鉅者也虔久次乾谿棄疾使以先歸復所告而師潰
王縕比立未定又以王至周呼恐之使自殺深險變
詐一舉而吞兩兄遂應當璧之兆巧于紛臂矣虔篡
立而比弑之比弑立而棄疾又弑之乖沴所鍾自相
屠剥固積惡之殃所必至觀棄疾嗾比于弑然後攘
國于亂賊之手其設心措慮之慘毒蠱之尤鉅者也
兩傳曰殺公羊曰弑從公羊

秋公會劉子晉侯齊侯宋公衛侯鄭伯曹伯莒子邾子
滕子薛伯杞伯小邾子于平丘八月甲戌同盟于平丘
晉悼公興伯之初同盟雞澤而單子會以諸侯有異
志姑假王室卿士以為重也諸侯既盟之後即芻狗
視之自是會盟無王人者四十年是會劉子忽序之
諸侯之上必有大不得已者蓋自晉訖一孫林父而
諸侯貳聽一向戍而諸侯散楚雄視漢上氣勢翕赫
滅陳滅蔡圜視莫救中國氣自厭厭矣故又屈劉子

為是會以繫諸侯之心時楚兄弟相屠荐犯大惡聲
罪致討正晉伯復興之機治兵邾南甲車四千乘王
人在前諸侯在後以此衆進師出有名楚雖彊可以
氣厭而義傾也顧徒能服齊以為威而不能致楚之
討宜中國終于厭厭也再書平丘春秋不惟有憾于
晉且有憾于劉子

公不與盟晉人執季孫意如以歸公至自會

晉伯方興則厚魯以繫列國之心晉伯既衰則薄魯

以折諸侯之氣前以僑如譖故不見成公執行父今以邾莒愬故公不與盟執意如以歸君臣同辱而季氏之罪狀不白豈伯討乎公以會致晉以人舉直書其事而不諱者甚盟主之虐用其威也

蔡侯廬歸于蔡陳侯吳歸于陳

國之存亡視人心之去留一旅可以祀夏三戶可以亡秦國雖滅而有不滅者存也陳蔡嘗為楚滅矣今以自歸為文前不與虔之滅後不與棄疾之專封固

也然滅陳滅蔡之日悼太子之子吳與隱太子之子廬未知其誰立而皆以爵歸國雖見滅其餘民猶相與扶植故君之遺嗣以幸一日之復興是陳滅而陳之民未忘陳蔡滅而蔡之民未忘蔡也而況棄疾篡立之始凜凜然不敢寧晉方合諸侯于平丘又安保其不吾討是以假興滅繼絕之義復兩滅國以及諸遷國示非有所利而攘之且使知吾之立一反前轍而圖其新則反側者安窺覷者定離貳者合而竊議

浮謗者弭國庶幾靖矣棄疾巧於自為謀皆此類也
史記平王以詐弑兩王而自立恐國人及諸侯叛之
乃施惠百姓復陳蔡之地而立其後蓋識此意

冬十月葬蔡靈公

公如晉至河乃復

吳滅州來

楚吳皆僭王楚滅國類稱人吳滅州來以國舉春秋
豈寬於楚而嚴於吳哉楚所滅大抵其與國之背已

者吳直滅人之與國以逞威耳況入州來已五十餘
年眈眈虎視竟間楚亂而滅之自此滅巢滅徐其勢
日盛晉通吳之責有歸矣

十有四年春意如至自晉

意如專政于魯大蒐比蒲敢僭天子之禮用人亳社
始效悖亂之俗以凶傲伎狠濟無君之心疽癰內訌
痲蹠外錮魯之命脉其存幾何使晉因邾莒之愬執
而歸周肆諸市朝不獨為魯拔一蠹根亦足俾列國

大夫暴蔑其君者知所儆懼乃以子服惠伯之私縱而歸之虎兕出柙其傷愈多魯之君臣雖喜其幸而免亦憂其不幸而脫告至于廟儼如公至肆無忌憚甚於未執公其危矣哉行父執而歸不致意如執而歸乃致春秋蓋深痛魯之有兩君也不然何去其族

三月曹伯滕卒

夏四月

秋葬曹武公

八月莒子去疾卒冬莒殺其公子意恢

放太甲于桐有伊尹之志則可無伊尹之志則篡也

莒著丘公卒蒲餘侯茲夫與公子鐸為國選立人心
所與之庚興以易郊公之不肖不可謂無功而國君
廢立一出大夫之手非所以訓也故不書郊公之出
而書其所善意恢之見殺以著當國者徇逐其君專
殺公子之罪

欽定四庫全書

卷二十四